

O economista **Antón Costas** ingresa na **Academia de Ciencias**



Antón Costas, durante o seu discurso de ingreso na RAGC. Foto: Suso Rivas

Redacción

15/04/2024

A Real Academia Galega de Ciencias (RAGC) celebrou hoxe no compostelán Pazo de San Roque o acto de ingreso de **Antón Costas Comesaña** (Vigo, 1949), actual presidente do Consello Económico e Social de España, como académico correspondente da institución. O economista galego pronunciou o seu discurso de ingreso, titulado “Camiños para facer fronte aos novos desafíos económicos e construír un novo contrato social: diálogo, negociación e consenso”, que foi contestado en nome da RAGC polo académico **Alberto Gago Rodríguez**.

O presidente da RAGC, **Juan Lema**, abriu o acto, ao que asistiron outros académicos, así como o presidente da Comisión de Economía, Comercio e Transformación Dixital no Congreso dos Deputados, **Pedro Puy**; a deputada do Grupo Parlamentario do BNG **Iria Carreira**; os deputados do Grupo Parlamentario do PSdG-PSOE **José Ramón Gómez Besteiro** e **Julio Abalde**; o director da Área de Xestión de Gain, **Benito Fernández**; o presidente do Consello Económico e Social de Galicia, **Manuel Pérez**; o secretario xeral de Universidades, **José Alberto Díez de Castro**; a vicerreitora de Política Científica da Universidade de Santiago, **Pilar Bermejo**; e a presidenta do Consello da Cultura Galega, **Rosario Álvarez**; xunto a

outros representantes de institucións políticas, económicas, empresariais, culturais e académicas galegas e familiares do homenaxeado.

Publicidade



Un firme compromiso con Galicia e co seu desenvolvemento

O presidente deulle a benvida ao novo académico, ao que cualificou como “un economista transformador, referente en España, que está a deixar unha pegada importante na nosa sociedade, pola súa capacidade para xerar ideas innovadoras, fomentar o diálogo e o consenso, e defender políticas que impulsen o desenvolvemento económico e social”. Puxo de relevo que “ao longo da súa carreira ten sido un defensor incansable de políticas que promovan a igualdade de oportunidades, a xustiza social e, ao mesmo tempo, un crítico construtivo das prácticas económicas que perpetúan a desigualdade e a exclusión”. Ademais, destacou o feito de que “ao longo da súa vida ten mantido un firme compromiso con Galicia e traballado incansablemente para promover o seu progreso”.

Un novo contrato social

No seu discurso, **Antón Costas** sostivo tres ideas complementarias. “A primeira é que, se queremos pechar o paso aos novos fascismos del século XXI, temos que construír un novo contrato social que dea resposta á frustración, o resentimento e a incertidume existente nas clases media e traballadora. Un **contrato social** focalizado en devolver dignidade e recoñecemento ao traballo e na creación de bos empregos, capaz de fomentar o dinamismo económico á vez que unha sociedade xusta. O risco de fallar é repetir os erros dos anos vinte e trinta do século pasado”. No segundo punto referiuse á importancia do diálogo, a negociación e o acordo para avanzar na Axenda 2030. Para iso, constatou, é necesario unha sociedade informada, capaz de distinguir entre “unha política pragmática dunha populista”.

En terceiro lugar, Antón Costas sinalou que os bos empregos, a produtividade e a erradicación da pobreza infantil son prioridades nas que se debe sustentar ese novo contrato social en España. Ou novo académico referiuse tamén a “retos existenciais” como a **inclusión social**, ou **cambio climático**, a transición dixital, a xeopolítica e a demografía. E rematou o seu discurso declarando que “en contra do

que se pensa, estes tempos de frustración, resentimento e incerteza favorecen a construción dun novo contrato social”.

O pacto social

O académico **Alberto Gago Rodríguez**, catedrático de Facenda Pública da Universidade de Vigo, respondeu á disertación do novo membro da RAGC, destacando “o pacto social, a cohesión social e a economía social” como “a tríade de intereses, obxectivos e motivacións que inspiran o traballo do profesor Costas Comesaña”. Puxo de relevo que “foi profesor universitario, investigador, divulgador e docente recoñecido durante décadas. Pero nese tempo foi e fixo moitas máis cousas este directivo, analista, activista e promotor social, participando como experto e consultor en comisións oficiais de asesoramento a Gobernos e Parlamentos, desenvolvendo unha actividade moi recoñecida como columnista e divulgador, e exercendo un compromiso crecente nos diversos postos de responsabilidade que foi asumindo nos sectores público e privado”.
